



REPUBLIKA E SHQIPËRISË

## KËSHILLI I LARTË GJYQËSOR

### VENDIM

Nr. 104, datë 05.07.2019

### PËR

### **SHPLLJEN E KËRKESËS PËR KANDIDATURA NGA RADHËT E GJYQTARËVE PËR KOMANDIM NË KËSHILLIN E LARTË GJYQËSOR, KOHËZGJATJEN, KRITERET DHE PROCEDURËN E KOMANDIMIT**

Këshilli i Lartë Gjyqësor, mbështetur në nenin 79, shkronja “b”, të ligjit nr.115/2016 “Për organet e qeverisjes së sistemit të drejtësisë”, si dhe në nenet 53, 54, 57 dhe 58 të ligjit nr.96/2016 “Për statusin e gjyqtarëve dhe prokurorëve në Republikën e Shqipërisë”, me bashkë propozim të Komisionit të Zhvillimit të Karrierës dhe Komisionit të Vlerësimit të Etikës dhe Veprimtarisë Profesionale,

### VENDOSI:

#### **I. Shpallja e kërkesës për kandidatura**

1. Shpalljen e kërkesës për kandidatura nga radhët e gjyqtarëve për komandim në Këshillin e Lartë Gjyqësor për:
  - a. Dy pozicione “këshilltar ligjor” në Njësinë Mbështetëse të Komisioneve të Këshillit të Lartë Gjyqësor;
  - b. Dy pozicione “nëpunës përgjegjës për vlerësimin” në Njësinë e Vlerësimit Profesional dhe Etik të Gjyqtarëve.
2. Afati i paraqitjes së kërkesave për komandim është dy javë nga dita e shpalljes së këtij vendimi në faqen zyrtare të internetit të Këshillit të Lartë Gjyqësor.
3. Kandidati duhet të paraqesë këto dokumente:
  - a. Kërkesë me shkrim për shfaqjen e vullnetit për komandim bashkë me pozicionin ku kërkon të komandohet;
  - b. Jetëshkrimin, ku kandidati pasqyron, veç të tjerash, çdo të dhënë në lidhje me kriteret e komandimit, përveç edhe të dhënat mbi historikun e arsimimit dhe rezultatet e tij;
  - c. Certifikatë/dëshmi për gjuhën e huaj;
  - ç. Pesë dokumente ligjore, vendime gjyqësore, artikuj apo botimeve shkencore në fushën e jurisprudencës, etj.;
  - d. Çdo dokument tjetër që tregon plotësimin nga kandidati të kriterëve të komandimit.

## II. Kohëzgjatja, kriteret dhe procedura e komandimit

1. Kohëzgjatja e komandimit është 2 (dy) vjet.
2. Komandimi mund të përsëritet edhe për një kohëzgjatje tjetër deri në 3 (tre) vjet.
3. Kohëzgjatja e komandimit mund të përfundojë para afatit:
  - a. me kërkesë të gjyqtarit, për shkaqe të justifikuara;
  - b. kur vazhdimi i komandimit bie ndesh me interesat e lartë të gjykatës ku i komanduari ushtron funksionin e gjyqtarit.
4. Kriteret e komandimit janë:
  - a. Kandidati të ketë eksperiencë në punë si gjyqtar jo më pak se 3 (tre) vjet;
  - b. Komandimi të mos bjerë ndesh me interesat e lartë të gjykatës ku kandidati ushtron funksionin e gjyqtarit;
  - c. Kandidati të mos jetë në një pozicion me mandat të kufizuar;
  - ç. Kandidati të mos jetë i komanduar;
  - d. Kandidati, që ka qenë i komanduar më parë, të ketë shërbyer jo më pak se 5 (pesë) vjet si gjyqtar pas përfundimit të periudhës së mëparshme të komandimit;
  - dh. Kandidati të mos ketë masë disiplinore në fuqi.
5. Ka përparësi kandidati që plotëson këto kriteret:
  - a. Ka ekspertizë të veçantë në fushën e hartimit të akteve rregullatore;
  - b. Ka njohuri mbi legjislacione të vendeve të Bashkimit Evropian, mbi akte ndërkombëtare dhe mbi jurisprudencën e gjykatave ndërkombëtare, në lidhje me statusin e gjyqtarit dhe organizimin e sistemit gjyqësor;
  - c. Është autor i artikujve ose botimeve shkencore në fushën e jurisprudencës;
  - ç. Ka njohuri të mira të paktën në një gjuhë të vendeve të Bashkimit Evropian;
  - d. Ka aftësi të mira profesionale, organizative, personale, si dhe etikë të lartë dhe angazhim ndaj vlerave profesionale.
6. Për vlerësimin e kriterëve të kandidimit, Këshilli i Lartë Gjyqësor mbështetet në dokumentacionin e paraqitur nga kandidati, në dokumentacionin e administruar nga Këshilli, në dokumentacionin e dosjes personale të kandidatit, si dhe në çdo dokument tjetër që mund të merret nga burimet e përcaktuara në nenin 77 të ligjit nr.96/2016 “Për statusin e gjyqtarit dhe prokurorit në Republikën e Shqipërisë”.
7. Brenda dy javëve pas afatit të aplikimit, Komisioni i Zhvillimit të Karrierës përgatit një projekt-opinion për çdo kandidat dhe vlerëson nëse komandimi nuk është në përputhje me interesat e lartë të gjykatës ku kandidati ushtron funksionin. Projekt-opinionin për çdo kandidat shqyrtohet nga Këshilli i Lartë Gjyqësor jo më vonë se një javë pas njoftimit të Kryetarit të Këshillit për përgatitjen e tyre. Opinionet e miratuara nga Këshilli publikohen në faqen zyrtare të tij. Këshilli vendos përjashtimin nga komandimi të kandidatit, komandimi i të cilit nuk është në përputhje me interesat e lartë të gjykatës ku ai ushtron funksionin apo kur për kandidatin verifikohet ndonjë prej kriterëve të tjera ndaluese të komandimit.

8. Procedura e komandimit vijon me vlerësimin e kriterëve të kandidimit për të gjithë kandidatët që nuk janë përjashtuar nga kandidimi sipas pikës 7 të këtij Kreu. Ky vlerësim bëhet nga Komisioni i Vlerësimit të Etikës dhe Veprimtarisë Profesionale, i cili, kur çmon të nevojshme, mund të intervistojë kandidatin për verifikimin e kriterëve të kandidimit. Intervista dokumentohet në një procesverbal me shkrim.
9. Komisioni i Vlerësimit të Etikës dhe Veprimtarisë Profesionale brenda dy javëve i paraqet Këshillit të Lartë Gjyqësor një raport ku pasqyrohen të dhënat rreth përmbushjes nga kandidatët të kriterëve të kandidimit, përveç edhe një renditje të tyre duke filluar nga kandidati i vlerësuar më mirë. Krahas kësaj, Komisioni i paraqet Këshillit dhe një propozim për komandim me emrat e katër kandidatëve të renditur më lart.
10. Brenda një jave nga paraqitja e raportit dhe propozimit për komandim, Kryetari i Këshillit të Lartë Gjyqësor thërret mbledhjen plenare, për të vendosur në lidhje me komandimin e gjyqtarëve kandidatë në secilin nga dy pozicionet e mësipërme.
11. Këshilli i Lartë Gjyqësor vendos komandimin për secilin nga gjyqtarët kandidatë të propozuar nga Komisioni i Vlerësimit të Etikës dhe Veprimtarisë Profesionale. Në rast të mosmiratimit të propozimit të Komisionit të Vlerësimit të Etikës dhe Veprimtarisë Profesionale, çdo anëtar i Këshillit të Lartë Gjyqësor mund të propozojë komandimin e një gjyqtari tjetër kandidat që plotëson kriteret e komandimit. Ky propozim i nënshtrohet votimit të Këshillit të Lartë Gjyqësor.
12. Nëse asnjë prej gjyqtarëve kandidatë nuk komandohet, Këshilli i Lartë Gjyqësor mund të rishpallë kërkesën për kandidaturë nga radhët e gjyqtarëve për plotësimin e pozicionit “këshilltar ligjor” në Njësinë Mbështetëse të Komisioneve të Këshillit të Lartë Gjyqësor dhe në atë “nëpunës përgjegjës për vlerësim” në Njësinë e Vlerësimit Profesional dhe Etik të Gjyqtarëve.

Ky vendim hyn në fuqi menjëherë me botimin e tij në faqen zyrtare të internetit të Këshillit të Lartë Gjyqësor.

## **PËR KËSHILLIN E LARTË GJYQËSOR**